

## Yang di-Pertuan Negara Singapura

3 haribulan Disember 1959 ini ialah hari

yang berperistiwa kepada penduduk Singapura. Hari yang bersejarah ini akan dirayakan dengan meriahnya sebagai Hari Pertabalan Yang di-Pertuan Negara.

Pada hari inilah “Minggu Persetiaan Negara”

akan dimulakan dengan perayaan yang besar di bawah kibaran bendera merah putih yang bertatahkan “Bulan Bintang”.

Lagu “Majulah Singapura” ciptaan Tuan

Zubir Said, yang telah dirasmikan menjadi lagu negara Singapura akan dinyanyikan beramai-ramai dengan penuh semangat pada hari itu dan seterusnya.

## Lambang Taat Setia Rakyat Seluruhnya

Pada 11 November yang lalu, Dewan Perhimpunan

Undangan Singapura, telah meluluskan usul lambang negara, bendera dan lagu kebangsaan dengan sebulat suara.

Tuan Rajaratnam, Menteri Kebudayaan Singapura, tatkala mengemukakan usulnya itu berkata “ . . . . . sesuai dengan negara Singapura sekarang yang berpemerintahan sendiri maka sudah semestinya kita mempunyai simbol sendiri yang merupakan taat setia rakyat seluruhnya”

Beliau menerangkan, bahawa “Harimau dan Singa” yang berdiri mengapit perisai “Bulan Bintang” lambang negara

itu adalah merupakan “Perpaduan Singapura dengan Tanah Melayu”. Sementara warna merah dan putih (pada perisai dan bendera) adalah merupakan “Persamaan darah” dan “Kesucian”.

“Bulan Sabit”, kata beliau lagi, melambangkan Singapura “Sebuah negara baharu yang sedang maju”, manakala bintang-bintang yang lima adalah menjadi lambang demokrasi, perdamaian, kemajuan, persamaan dan keadilan.

## Takrif Pihak Pembangkang

En.Ali Alwi (wakil UMNO) telah memuji kerajaan kerana sikap bertolak ansur sehingga berjaya pemilihan lambang dan bendera yang demikian corak dan bentuknya. Beliau berkata: bahawa warna merah putih telah berkibar di Kepulauan Melayu semenjak zaman purba. Tentang bintang yang lima, kata beliau lagi, “Memang sesuailah dengan rukun Islam yang lima perkara.”

Takrif ini tidak dipersetujui oleh wakil “SFA”, kerana katanya wakil UMNO “telah membawa perkara agama dalam menyatakan pendirian pihaknya . . . .”

Dalam pada itu, beberapa orang ahli siasah Melayu dan Islam Singapura memandang, bahawa walau bagaimanapun bentuk takrif yang sudah atau akan diberikan orang,

maka “Merah Putih” tetap menjadi lambang kedaulatan Melayu, dan “Bulan Bintang” pula ialah lambang kedaulatan Islam!

### **Kemakmuran Tanah Melayu**

Dalam titahnya ketika membuka parliment Persekutuan Tanah Melayu baharu-baharu ini, Duli Yang Maha Mulia Timbalan Yang di-Pertuan Agong, menegaskan bahawa tugas kerajaan, pertama: hendak membina suatu bangsa yang tulen, kedua: hendak membina kemakmuran kawasan-kawasan kampung, dan ketiga: hendak mengadakan kerjasama dengan negeri-negeri di Tenggara Asia.

### **Apa Dia Kebangsaan Sejati itu?**

Dr. Burhanuddin, Yang di-Pertua PAS, telah bertanya: “ . . . apakah kebangsaan sejati dan tulen itu?”

Sebelum itu Dato’ Onn, Yang di-Pertua Parti Negara telah juga bertanya tentang rupa bangsa Persekutuan Tanah Melayu.

Bagi menjawabnya, Perdana Menteri Tengku Abdul Rahman

berkata, bahawa rupa bangsa Persekutuan Tanah Melayu ialah rakyat Persekutuan Tanah Melayu sendiri.


### **Bentuk Pakaian Kebangsaan**

Tatkala menjawab pertanyaan Dato’ Onn, Perdana Menteri Tengku Abdul Rahman berkata, bahawa pakaian kebangsaan yang diakui ialah pakaian kebangsaan Melayu dan juga diterima pakaian Barat dan pakaian kebangsaan masing-masing kaum.

### **Kemiskinan Rakyat Pantai Timur**

Dr. Burhanuddin, telah menyelar kerajaan Perikatan kerana mencuaikan nasib rakyat Pantai Timur.

Dua buah negeri (Kelantan dan Terengganu) itu katanya, ialah negeri-negeri yang mundur sekali tetapi hanya satu juta ringgit sahaja yang diberikan oleh kerajaan Perikatan kepada negeri-negeri tersebut.



Gambar kenang-kenangan pelajar-pelajar dan guru-guru Madrasah al-Khairiyah, Kupang Baling, Kedah. Yang bertanda (di tengah-tengah) ialah

Tuan Haji Hasan mudir madrasah itu.